


ՔԱՐՈՉԽՕՍԱԿԱՆ



Տ. ԱՂԱՆ ԱՐԵՂԱ ԵՐՆՃԱԿՅԱՆԻ ՔԱՐՈՉՐ՝
ԽՈՍՎԱԾ Ս. ԷՋՄԻԱՍՆԻ ՄԱՅՐ ՏԱՃԱՐՈՒՄ
Ս. ԿՈՒՅՍ ՄԱՐԻԱՄ ԱՏՏՎԱԾԱԾՆԻ ԾՆԵՂՅԱՆ ՏՈՆԻ ԱՌԻԹՈՎ

(8 սեպտեմբերի 2018 թ.)

«Յանուն Հօր եւ Որդոյ եւ Հոգւոյն Սրբոյ. ամէն»

Սիրելի՛ քույրեր եւ եղբայրներ,

Այսօր Սուրբ Աստվածածնի ծննդյան տոնն է, Հայ Եկեղեցին այն տոնում է անշարժ կերպով ամեն տարի սեպտեմբերի ութին: Մենք այսօր փորձելու ենք վերստին խորհրդածել Սրբուհի Մարիամ Աստվածածնի կերպարի մասին ու մեզ համար կյանքի կարեւոր պատգամներ քաղել նրանից:

Սուրբ Աստվածածնի խորհուրդը հակասությունների, մարդկային մտքին ու տրամաբանությանը չենթարկվող երեւոյթների, բայց եւ պատմական իրականությունների մի շղթա է՝ ամուլ ծնողներ ու զավակի ծնունդ, առաջացած տարիք եւ երեխայի ծննդյան բերկրանք, Տիրոջ կողմից խոստման զավակ եւ աղջիկ ծնունդ: Թեւ Ս. Գրքում շատ ենք հանդիպում խոստման զավակների, սակայն բոլորն արու զավակներ են, ինչպես օրինակ՝ Սողոմոնը, Սամուելը, Սամսոնը: Շարունակելով այս ընթացքը՝ Աստվածածինը մայր է եւ կույս, մարդկային եւ աստվածային բնությունների հանդիպում, երկնքի ու երկրի միախառնում մեկ անձի մեջ, մահ եւ վերամիոխում... Երկար ու անվերջ կարելի է շարունակել այս թվարկումը. այսպիսին է Աստվածամայրը, այսպիսիներին է ընտրում Տերը եւ այսպես են բոլոր սուրբերը՝ տարօրինակ եւ գերմարդկային, Աստծուն իրենց մեջ կրող, ուրախ ու կյանքով լեցուն... Որոգիներս ասում է. «Սրբերն են, որ իրենց մեջ կյանք ունեն եւ իրենց մեջ կյանք ունեցողներն են սրբերը»:

Սիրելի՛ հավատացյալներ, մեզանից երկու հազարամյակ եւ մի քիչ ավելի տարիներ առաջ Հրեաստանում ապրում էր մի պարզ զույգ՝ Ս. Հովակիմն ու Սրբուհի Աննան։ Նրանք առաջացած տարիքում էին, սակայն զավակ չունեին, երկար սպասել էին Տիրոջ օրհնությանը, հարատեւ աղոթքի մեջ էին։ Ահա մի օր Ս. Հովակիմը Տաճար է գնում՝ սովորության համաձայն իր ընծաները մատուցելու, բայց Ռուփոս անունով քահանան նախատում է նրան ասելով, որ Տերը նրան չի օրհնել ու ամուլ է թողել, ուստի պետք է գնա ու երկար աղոթի Տիրոջը՝ այդ ամոթը իրենից հեռացնելու համար։ Բայց ինչպես ասվում է՝ մարդկանց առաջ անիրավը հաճախ Տիրոջ համար սուրբ կարող է լինել։ Ս. Հովակիմը վշտացած առանձնանում է, սկսում է պահքով ու աղոթքով զավակ խնդրել Տիրոջից, նույնն է անում նաեւ Սրբուհի Աննան։ Եւ շուտով Աստծուց ավետիս են ստանում ու ծնվում է զավակը, որին կոչում են՝ Մարիամ։

Նշանավոր հեղինակներից մեկն ասում է. «Մեր կյանքն ունի երկու կարեւոր հանգրվաններ եւ օրեր, մեկը՝ որում ծնվում ենք եւ երկրորդը՝ որում հասկանում ենք, թե ինչու ենք ծնվել»։ Այսօր մենք բոլորս Աստվածամոր ծննդյանն ու նրա կերպարին նայում ենք Ավետման խորհրդի եւ Հիսուս Քրիստոսի ծննդյան իրողությունների հիմքով։

Աստվածածինը մարդկության պատասխանն է Աստծու սիրուն։ Աստվածամայրը ցույց տվեց, թե ինչպես կարելի է արձագանքել իրական ու ճշմարիտ սիրուն՝ կատարյալ հնազանդությամբ։

Մի պատմություն կա. մի մարդ փոքրիկ մոմ է վերցնում, սկսում է երկար ու ոլորածեւ աստիճաններով բարձրանալ վեր։ Մոմը հարցնում է մարդուն՝ «Ո՛ր ենք գնում»։ Մարդն ասում է, որ բարձրանում են վերեւ, որպեսզի այնտեղից լուսավորեն տասնյակ մղոններ հեռավորության վրա գտնվող նավերին ու մարդկանց։ Մոմն ասում է, որ ինքը շատ փոքր է, փոքր է նաեւ իր լույսը, ինչպե՞ս կարող է այդքան ուժեղ լուսավորել։ Մարդը պատասխանում է ասելով՝ «Շարունակիր վառվել ու լուսավորել նույն կերպ եւ ամեն ինչ պարզ կլինի։ Հասնում են մի սենյակ, որի կենտրոնում դրված է լինում մեծ կանթեղ։ Մարդը մոմը մոտեցնելով վառում է կանթեղն ու դրա ետեւում դրված մեծ հայելիները լույսը տարածում են տասնյակ մղոններ։

Սիրելի՛ հավատացյալներ, փոքրիկ մոմը Աստվածամայրն է, որից Հիսուս մարմին առավ։ Հայելիներն էլ առաքյալներն են, ովքեր Հիսուս Քրիստոսի Ծննդյան եւ Հարության ավետիսն ու լույսը տարածեցին աշխարհում։

Բոլոր ժամանակներում եւ այսօր էլ Տերը կամենում է մարմին առնել ու մարմնանալ, աշխարհ գալ մեր խոսքերի ու մեր գործերի միջոցով: Այսօր Քրիստոսի Ս. Եկեղեցին Ս. Մարիամ Աստվածամոր ծննդյան խորհրդի միջոցով մեզ պատգամում է կատարյալ հավատքով, հնազանդությամբ, հարատեւ ազդեցքով սպասել Տիրոջ այցելությանը, ինչպես որ Հովակիմն ու Աննան սպասեցին, որովհետեւ՝ «Տերը չի ուշանա՝ կգա»:

Սիրելիներ, Աստծու կամքն է ամեն ժամ գնալ դեպի Իր համար այնքան սիրելի մարդը, մարմին առնել մարդու միջոցով աշխարհի համար: Աստված կամենում է, որ մենք բոլորս աստվածածին լինենք, որ Հիսուս Փրկիչը միշտ մեր խոսքերում ու գործերում լինի:

Շնորհք, սէր եւ խաղաղութիւն Տեառն մերոյ եւ Փրկչին Յիսուսի Քրիստոսի եղիցի ընդ ձեզ եւ ամենեսեանս. ամէն:

